



**Quæstionum Canonicarum, In Quinque Libros  
Decretalium, Tomus ...**

In Librum V. Decretalium, Per Quadraginta, Et Unum Titulos Distributum,  
In quo agitur De Judicio criminali, exponendo primùm actiones in eo  
judicio instituendas, & suscipiendas, ...

**Schlüter, Georg**

**Augustæ Vindelicorum, 1709**

Quæstio XXXI. In Tit. XXXI. De Excessibus Prælatorum Et Subditorum.

---

[urn:nbn:de:hbz:466:1-73064](#)

quia quatuor minores ordines nondicuntur *sacri*. Ita Rebuffus in praxi beneficiorum, Tit. de Clericis ad sacros Ordines male promotis. Vasquez in 3. p. tom. 5. D. 246. c. 5. n. 47. (& ex illo Cotonius in summa Diana, V. Ordinis subjectum n. 27.) qui exprestè tenet, nullo jure prohibitum esse, eodem die conferre unum Ordinem sacram cum minori. Et testatur Vasquez se vidisse sic practicatum, & sine dubio sic fieri posse.

1134 Contrarium docet Joannes Maria Paserinus de Sextula Ordinis Prædicatorum, tom. 2. de hominum statibus, q. 189. Inspectione 10. c. 4. n. 839. dicens, suscipientem *sacrum ordinem simul cum uno minori*, esse suspensum ab eo, quem illegitimè suscepit ex c. per literas, de temporibus ordinat. citarque pro se, præter alios, Barbosam, de offici. Episcopi, allegat. 14. n. 1. & in Trid. Sess. 23. c. 13. n. 14. Sed c. literas, exprestè loquitur de duobus *sacris* Ordinibus. Tridentinum nullum verbum habet, quod eodem die conferri non possit unus ordo facer cum altero minori. Barbosa in cit. loc. Trid. loquitur solùm de *duabus sacris*, non autem *uno sacro*, alteronon *sacro*. Rectius afferri posset c. 2. de eo, qui furtivè; ex quo Pirhing h. t. n. 7. docet, quod Sub-Diaconatus eodem die conferri non debeat cum minori ordine, nisi

alicubi vigeat contraria consuetudo, id, quod etiam tenet Barbosa in cit. c. 2. n. 2. Verum cit. c. 2. ad hoc male allegatur, cùm solùm loquatur de illo, qui suscepit *minoribus Ordinibus non contentus*, eodem die *Sub-Diaconatum ausu temerario* (seu furtivè) suscepit, ut exprimit ipse Barbosa cit. n. 1. & communiter Canonistæ, patetque ex titulo, sub quo ponitur c. 2.

¶. 4. Episcopum posse dispensare cum 1135 illo, qui suscepit quatuor minoribus eodem die etiam furtivè Sub-Diaconatum suscepit, ut in illis, quos furtivè non recepit, ministret. Idem est de Abbatे, qui cum tali Clerico, si Religionem ingressus est, etiam in furtivè suscepto ordine dispensare potest, ut dicitur cit. c. 2. cuius verba sunt: *Cum H. lator praesentium, sicut nobis suâ questione monstravit, ad tuam (ordinationis causâ) praesentiam accessisset; iuxta consuetudinem patrie sibi quatuor minoribus ordines contulisti. quibus non contentus, Sub-Diaconatum temerario ausu recepit. Quia vero idem Clericus in hoc facto multum excessit, mandamus, quatenus cum in minoribus duntaxat Ordinibus celebrare permittas. Si vero domum Religionis intraverit, & vita, & mores ejus exegerint. Abbas (si voluerit) in aliis poterit Ordinibus dispensare.*

## QUÆSTIO XXXI.

### IN TIT. XXXI. DE EXCESSIBUS PRÆLATORUM ET SUBDITORUM.

**P**remissis illis, quæ generliter attingunt excessus, seu delicta tam Prælatorum, quam subditorum; nunc specialiter agendum est de excessibus Prælatorum in subditos, & horum in suos Prælatos; quos illi committunt, sibi subjectos gravibus mandatis, prohibitionibus, censuris, & aliis oneribus indebetè gravando; isti autem subjectionem, sub obligatione positam, negando.

#### ARTICULUS I.

*Qualiter Prælati Ecclesiastici excedere, seu delinquere possint in Clericos sibi subditos?*

**N**on est dubium, etiam Prælatos Ecclesiasticos, quandoque in tractandis suis subditis excedere, ipso jure idagno sciente, ut patet ex rubrica hujus tituli. Et quamvis excedere, alioquin idem significet, ac superare, & antecellere; hoc tamen loco idem

idem est, ac *transgredi limites, seu terminum debitum*; & talis transgresio hic vocatur *excessus*. Tales porro excessus illis sub gravibus etiam poenis prohibentur. Quare dicendum. 1. Prælatis Ecclesiasticis cillitium esse, Clericos, vel Regulares, suæ jurisdictioni subjectos, talliis, vel exactioribus indebitis onerare, & nisi juxta ipsorum voluntatem solvant pecuniam, divinum officium interdicere; injustè, ac illicitè censuras in eos ferre, vel inhonestè eos tractare, ut Laicis despicabiles fiant; prout aperte decisum est in c. 1. h. t.

**1137** Dicendum. 2. eisdem non licere, siue legitima causa, Ecclesiam alteri inferiori Prælato subjectam, ab ejus subjectione, & obsequio liberare, c. 2. cod. Unde, licet Archidiaconi vi consuetudinis legitimè præscriptæ possint acquirere servitia sibi præstanta ab aliis Ecclesiis in suo Archidiaconatu sitis; esto alias de jure communi, Archidiaconis non debeant alia Ecclesiae, ac earum Rectores præstare servitia, & obsequia, nec jurisdictionem in illas habent (cum eorum officium plurimum consistat in consuetudinibus, glossa fin. in cit. c. 2.) Episcopi tamen non possunt Clericos sibi subditos privare suis Ecclesiis, iuribus, redditibus, vel consuetudinibus, nec etiam minuere. Sic Barboſa in cit. c. 2. n. 1.

**1138** Dicendum. 3. non licere Episcopis, aliquo Prælatis, Ecclesiis, vel beneficia, quorum ordinatio, vel collatio ad ipsos spectat, sibi retinere; hoc enim numeratur inter excessus illis prohibitos in c. ad aures, 3. h. t. quod procedit; etiam si beneficium sit manuale, ut vult Pirhing h. t. n. 6. Ex quo sequitur, si Prælatus Episcopo inferior beneficium, cuius collationem, vel institutionem habet, sibi retineat, vel indigo conferat, jus conferendi, vel instituendi devolvi ad Superiorem; licet possit sibi retinere Custodiā Ecclesiae vacantis, dum ei de Rectore provideatur. Glossa in c. ad aures. V. Intrudere.

**1139** Dicendum 4. excedere Episcopos, aliquo Prælatos, si Ecclesiis, vel beneficia scienter conferant indignis, c. inter dilectos 11. h. t. Hic excessus frequens est; cum revera contingat, beneficia, etiam curata, conferri nonnullis amore sanguinis, vel ad preces aliorum, à quibus resulget spes reciproca, vel ob alios fines retemporales, concedi notoriè indignis,

qui communiter administrationi per se ipsos inepti, per vicarios quandoque ru-des, magno animarum damno, satis misere suis Ecclesiis deserviunt, contenti proventibus, DEI cultu poitremum, aut quandoque nullum locum obtinent.

Dicendum 5. illos excedere, si injustè 11. 49 impediunt privilegia subditorum à summis Pontificibus indulta. Unde si Episcopus aliquid à subdito contra ipsius privilegium exigat, v. g. contra libertatem sui ordinis, concessam à summis Pontificibus, non tenetur ei obedire, ut dicitur c. Sanè 5. h. t. & excommunicatio ab Episcopo lata, contra talem subditum, in dicto casu non parentem, est irrita, & nulla c. cum ad quo-rundam, 7. cod.

Dicendum 6. inter excessus numerari, 11. 49 adeoque jure communi etiam prohibitum est Prælatis, Episcopo inferioribus, penitentias publicas, & solennes imponere ex c. Accedentibus, & c. in capite 64. dist. 50. vel concedere indulgentias; quia hoc est dignitatis Episcopalis, ut vult Azor p. 2. l. 3. c. 55. q. 3. et si contrarium teneat Layman, Rodriguez, tom. 22. qq. Regul. q. 87. a. 1.

Quoniam autem quandoque ab Epi-scopis, & aliis Ecclesiasticis personis, multum etiam contra Regulares excedit (ut exponit Gregorius IX. in c. Nimis iniqua, 16. h. t.) iis praetertim, qui eaçà cupiditate, ut loquitur textus, seducti propria aviditate substrahi reputantes, quidquid Religiosis viris fidelium pietas elargitur, quietem illorum multipliciter inquietant: ideo dicendum 7. non licere Prælatis Ecclesiasticis à Religiosis exigere, ut contra regulam à Sede Apostolica approbatam, & sui Ordinis instituta, etiam inviti debeant illis confiteri, penitentiam, ac Eucharistiam recipere. Illud citum pariter est. 1. Prælatis Ecclesiasticis, velle, ne corpus Christi in Regularium Ora-toris reservetur; 2. exigere, ut fratres ipsorum defuncti apud Ecclesiis suas sepeliantur, nimis talibus Prælatis subje-ctas; 3. cogere, ut si quis decedentium Fratrum alibi, quam in suis Ecclesiis eliat sepulturam, funus primo ad Ecclesiis suas deferatur, ut oblatio suis eorum Prae-litorum usibus cedat. Præter hac excedunt 4. quod non sustineant Regulares habere campanam, vel cœmiterium benedictum; 5. quod certis tantum diebus permittant ipsos celebrare divina; 6. quod velint in dominibus eorum certum numerum fra-trum,

In Tit. XXXI. De Excessibus Prælatorum, &c. 249

trum, Sacerdotum, Clericorum & laicorum, nec non cereorum, lampadum, & ornamentorum, pro voluntate sua taxare, ac residuum cereorum, quando noviter apponuntur, exigant ab eisdem; 7. quod non permittant, novos Sacerdotes eorum, alibi, quam in Ecclesiis suis celebrare primas Missas, eos nihilominus compellentes, ut in quotidianis Missis, quas in suis locis, & Altaribus celebrant, oblationes ad opus eorum recipiant & reservent; 8. Quod quidquid eis, dum celebrant Missarum solemnia, intra domorum suarum ambitum piâ fidelium devotione darur, ab ipsis extorquere oblationis nomine contendant; 9. Quod eisdem, tam in ornamenti Altaris, quam in libris Ecclesiasticis, absolutè collata, vindicent perperam juri suo. Sic Gregorius cit. c. *Nimis iniqua.*

Idem Gregorius universis Ecclesiis Prælatis scribens, c. *Nimis prava*, 17. codem; enumerat alia duodecim gravamina, Prædicatoribus, & Minoribus intentata, præcipiens dictis Prælatis omnino abstinere. Illa porrò sunt sequentia, quod eos cogant ad *Synodos suas accedere*, ac suis constitutionibus subjacere; nec his contenti, Capitula, & scrutinia in locis fratum pro his corrigendis facturos se comimentur, fidelitatem juramento firmata ab eorum Ministris & Custodibus exigentes; quod eis, ut tam extra civitates, quam intra, cum eis processionaliter veniant, ex levi causa mandent; excommunicationis sententiam fulminent in benefactores ipsum; id ipsum fratibus comminentur; eos de locis, in quibus Domino famulantur, satagant amovere, nisi eis obedient in omnibus supra dictis. Quod, ne fratres ad honorabiliores civitates & villas, ubi religiosè, ac honestè valent commorari, à populis devotè vocati, accedere audeant, inhibeant. Quod tam in accedentes fratres, quam in receptratores eorum presumant excommunicationis sententiam promulgare; ab eis, etiam de hortorum fructibus, decimas, nec non de habitaculis fratum (sicut de Juðorum domibus) contendant redditus extorquere (asserendo, quod nisi fratres morarentur ibidem, ab aliis habitatoribus proventus aliqui solverentur) volentes eos suæ totaliter ditioni subdere; eisdemque Ministros & Custodes præficere profus arbitrio voluntatis.

Tom. V.

Dcmum in Clementina *frequens*, de 1144 excessibus Prælatorum, Clemens V. expressè ait: à plerisque Episcopis, ac eorum Superioribus, ac ceteris Ecclesiis Prælatis dictorum Religiosorum quietem injūstè in subsequentibus multipliciter inquietari: nimurum, quod exemptos capiant, & incarcern in casibus non concessis à jure; per gravium interminationem poenarum impidiunt, ne, qui debent exemptis decimas, seu redditus, illos solvant eisdem: neve aliqui missas eorum audiant; quod molant in molendinis, & coquant in furnis eorum: *servientes quoque, & vasallos, & domesticos eorumdem*, vel *alios qualitercunque contrahentes, & participantes cum ipsis*, suspendant, interdicant, & excommunicent absque causa rationabili, pro libito voluntatis; bona illorum nihilominus interdum illicitè occupantes, & appellationibus, quas prædicti exempti, ob prædicta, vel alia gravamina rationabiliter interponunt, quandoque minimè deferentes, appellantes occasione appellationum hujusmodi interdum capiant, aut capi faciant, & carceri mancipari.

Secundò, quod Capellanos in Ecclesiis *pleno jure* spectantibus ad eos Regulares (licet nulla causa sub sit legitima) celebrare non finant, nec administrare parochianis Ecclesiastica Sacra menta; quidam etiam indebetè Abbates, Monachos, & Conversos exemptos, nec non & Clericos ipsis *pleno jure* subjectos (si eis non pareant) in iis, etiam, in quibus non tenentur eisdem, *inconsultâ facilitate* suspendant, excommunicent, capiant, & incarceren, ac loca, & Ecclesiis ipsorum interdicant; in exigendo insuper ab ipsis exemptis, ipsorumque subditis, subsidia charitatis excedant nimium contra eos, & insolitas, ac indebitas ipsis, contra jura, exactiones imponant. Novos census, & indebita onera parochialibus imponant Ecclesiis, in quibus exempti jus obtinent patronatus; Processus justè factos, seu sententias justè latas à delegatis Sedis Apostolicæ, vel à Conservatoribus pro exemptis, publicari, seu executioni mandari à suis subditis non permittant; Tabellionibus publicis inhibeant, ne instrumenta conficiant, & Judicibus, ne justitiam faciant; ac juris peritis, ne consilium, vel auxilium præbeant in causis, seu negotiis eorumdem.

Tertiò, quod *presentatos per exemptos* 1146

Ii

ad

*ad ordines*, vel beneficia ( quorum præsentatio ad eos pertinet ) *admittere non* *lunt*, nisi præsentantes ponant obedientiam in salutatione literarum, quas pro hujusmodi præsentatione transmittunt; Ecclesiis vacantibus, in quibus monasteria jus obtinent patronatus ( repulsi personis idoneis præsentatis ad eas ) personas instituant inhabiles, & indignas: quidam etiam Ecclesiis, curam animarum habentes, ad mensam Abbatum spectantes, quarum fructus, quandoque Clericis secularibus tradunt, seu concedunt ad firmam, Clericis ipsis decedentibus, suis conferant Clericis, quanquam ipse propter hoc Ecclesia in veritate non videntur; Nonnulli in Ecclesiis Monachorum, jura ipsorum iustitiae sibi approprient, & de ipsorum redditibus, ut volunt, ordinant, ita, quod Rectoribus earum non remaneat, unde valeant sustentari; quidam cum armis, & erecto vexillo, molendina, & alia bona contra iustitiam destruant exemptorum; ea etiam, quæ tanto tempore possederunt, quod de contrario memoria non existit: mittantque frequenter, ad monasteria suarum civitatum, & Dioecesum, suos consanguineos, & nepotes, & interdum animalia sua cum custodibus, ut eis de bonis monasteriorum debeat provideri: Abbas insuper, & Priors monasteriorum frequenter compellant, ut suis consanguineis, & nepotibus suorum, Monasteriorum, seu Prioratum possessiones concedant in perpetuum, vel ad tempus; quas quidem concessiones, vel pensiones Nos, ut ibidem ait Clemens, *nullus esse volumus ipso jure*.

1147 Quartò, quod eosdem Abbates, & Priors quandoque compellant ad præsentandum sibi ad Ecclesiis vacantes, in quibus jus obtinent patronatus, & ad monachandum interdum suos familiares, consanguineos, vel nepotes: frequenter etiam permittant, & tacite consentiant, quod in suo dominio temporali per milites, vasallos, & ipsorum temporales officiales, Monasteriorum bona mobilia, & immobilia, per violentiam occupentur in casibus non permisis à jure, & aliae variae iuriæ personis Ecclesiasticis, & Monasteriorum hominibus irrogentur. Præterea, quod interdum iustitiae Abbates, Priors, ac alios beneficiatos, beneficiis suis privent, ut sic fructus beneficiorum illorum percipere valeant, primo anno, prætextu

privilegii, quod asserunt, se habere; quod usque ad certum tempus fructus beneficiorum vacantium possint percipere primi anni; quibus non contenti, equos, boves, thesaurum, & alia bona Monasteriorum, & beneficiorum vacantium illicite occupent, quæ essent fructus successoribus reservanda. Denique quod quidam ejusmodi Prælatorum militibus, & aliis potentibus dignitatibus suarum redditus, & proventus vendant ad tempus, ut per se ipsos exempti vicini fortius opprimantur; nonnulli etiam indebet monasteria dirimant; alii domos, & hospitalia, & alia bona Monasteriorum mobilia, & immobilia frequenter occupent, & detineant occupata; plures quoque sine causa justâ impediant, ne exempti loca sua valeant reparare; quidam statuta faciant, per quæ derogetur privilegium exemptorum: & generaliter quam plures Prælati præsertim exemptis, & privilegiatis Religiosis; in personis, & rebus suis, ac juribus spiritualibus, & temporalibus, graves inferant contra iustitiam, & eorum privilegia iurias, & iacturas.

Concludit tandem constitutionem suam sequentibus verbis efficacissimis: *Vrum, quia una est Regularium, & secularium Prælatorum, & subditorum exemptorum. & non exemptorum universalis Ecclesia, extra quam nullus salvatur, quorum omnium unus est Dominus, & una fides, & unum Baptisma: decet, ut omnes, qui ejusdem sunt corporis, unus etiam sint voluntatis, & sint fratres ad invicem, vinculo Charitatis, sint adstricti. Decet igitur, ut & Prælati, & alii tam exempti, quam non exempti, iuris juribus sint contenti, & alter in alterius iuriam non proficiat, seu jacturam. Universis itaque Prælatis Ecclesiærum presentis Sanctionis editio districte precipiendo mandamus, quatenus ipsi à predictis gravaminibus omnino cessantes, & cessare suos subditos facientes, viros Religiosos, exemptos, privilegiatos & non exemptos, mendicantes, & non mendicantes, Charitativè tractent, & foveant, & sua jura, & privilegia inviolabiliter eis servent. Ergo nam plus solet timeri, quod specialiter quam quod generaliter inhibetur, eisdem Prælatis districte inhibemus, ut Abbates, Priors, & alios Religiosos, ne ad sua generalia, vel provincialia vadant capitula, impideat quomodolibet non presumant. Ex quibus tatis aperte constat, predictos Ecclesiastorum*

In Tit. XXXI. De Excessibus Prælatorum, &c. 251

corum Prælatorum excessus gravissime  
ipsis prohibitos esse.

ARTICULUS II.

De excessibus Subditorum contra Prælatos,  
seu Superiores suos.

1149 **N**on est dubium, etiam subditos contra Superiorum variis modis excedere; reverentiam Superioribus denegando; coram secularibus contra eos super rebus spiritualibus deponendo; Dominos negando contra homagii fidem; eos invadendo; aut invasoribus eorum complicibus causam, vel consilium præbendo; de quibus c. 15. h. t. statuitur, ut perpetuo abscindantur ab Ecclesia, & eorum beneficia iis, qui digni sunt, assignentur. Similiter in Superiorum peccant subdit, si non sunt continentes, c. Clerici 4. h. t. Si Ecclesiam suam, vel sibi subjectam, citra consensum Episcopi subjecerint, vel univerint alteri, non obstante assentu, vel confirmatione Metropolitani, c. *sicut unire*, 8. eodem; si homicidio directe vel indirecte auctoritatem, vel consilium præstiterint, c. *ex li-*  
*teris* 10. eod. si sibi constituant collegium, vel fabricent sigillum, c. *dilecta*, 14. h. t. Personatum sibi falso afflant; contra eos, quibus fide, & Sacramento adstricti sunt, si erigant, de quibus in c. 6. h. t. dicitur, ut in eo Episcopatu non admittantur ad officii sui executionem? Prohi-

bentur etiam peccata aliena in confessione audita, revelare, ne quidem compulsi c. *dilectus*, 13. h. t. Secundò de suis delictis gloriari (v. g. de copula commissa cum aliena muliere) & hi ab officio, & beneficio sunt suspendendi, c. *quam sit*, 9. h. t. Tertiò sectari libidines, maximè contra naturam, propter quas vel à Clero deiiciendi sunt, vel ad poenitentiam in Monasterium detrudendi, c. 4. h. t. Quartò ea agere, unde scandalum oriri possit, v.g. frequentare ludos profanos, &c. de quibus agit titulus de vita, & honestate Clericorum. Excedunt præterea subditi contra suos Superiores, si Prælati Episcopo inferiores cognoscunt causas matrimoniales, c. *accidentibus*, 12. h. t. excipe nisi habeant proprium territorium, & jurisdictionem quasi Episcopalem, privativè ad Episcopum. Et ideo tales non veniunt nomine Prælati Episcopo inferioris, quando agitur de materia jurisdictionis. Vid. Pirhing h. t. à n. 21. Quintò, si Prælati Episcopo inferiores uniant Ecclesias sibi subditas sine consensu Episcoporum c. *sicut* 8. h. t. Ex quo colligitur Episcopum ex justa causa (de his, quæ à Prælat.) & consensu Capituli (arg. cap. *Pastoralis*, de donation. & Clement. 2. de rebus Ecclesiæ non alienan.) posse unire Ecclesias subjectas. Quod etiam procedit de Monasteriis illi subjectis, non tamen Ecclesiis Cathedralibus, ut docet Pirhing h. t. n. 19. Sed de hoc V. lib. 3.

QUÆSTIO XXXII.

IN TIT. XXXII. DE NOVI OPERIS NUN-

TIATIONE.

1150 **N**untiare novum opus est, illi, qui de novo in alterius præjudicium ædificat, prohibere, ne tale ædificium fiat, vel in iam coepto pergit, donec de jure ædificandi constet. Hæc novi operis nuntiatione, seu prohibito est quædam extrajudicialis appellatio; & ideo, è pendente, nihil est attentandum, ut docet Andr. Gail. l. 1. observ. 16. n. 2. cum communi.

Tom. V.

ARTICULUS I.

In quibus rebus, seu operibus locum habeat novi operis Nuntiatione?

**R**esp. quod in solis rebus immobilibus, 1151 sive in solis illis operibus, quæ solo conjuncta, aut conjungenda sunt, & in eo sic fiunt, ut in eodem permaneant. Et ideo messem colligere, vel arborem succidere, non pertinet ad hoc edictum

li 2

L. I.